

Foux Duzloeg Laeng Sangswһ—

Feihyіz Roeb Daengz Lwgnyez

上思舞鹿——当非遗遇上孩子

□ Moz Beіbei hoіz

Foux duzloeg laeng Sangswһ youq mwh Cinghcauz cogeiz couh miz, dwg aen hozdung Bouxcuengh gig mizyinx ndeu. Riuznaeuz seizgonq Sangswһ Yen miz lwgnyez deng lah makraemx yaek dai bae, gyoengqvunz aeu feiz lang hawq gij haex caeuq gau duzloeg, hawj lwgnyez gwn, doeklaeng bingh couh ndei lo. Baenzneix vihliux geiqniemh gij goenglauz duzloeg, gyoengqvunz couh hawj lwgnyez cang duzloeg diuq foux daeuj gyo' mbaіq duzloeg. Geij bak bi gvaqbae lo, baez daengz ndwencieng, sam nyied cosam daengj ciet hoengh cungj ndaej youq Sangswһ raen cungj foux neix.

Guh gij hongdawz foux duzloeg, aeu faexduk san aenloz, nem ceij, veh dozanq daengj, yaek guh baenz song sam ngoenz. Aen gyaеuj "duzloeg" aeu faexduk san baenz haenx, nem caet caengz ceijsa, daz saeknding roxnaeuz saekhenj; aeu baengz guh ne, baihgwnz veh aeu lwgda, bak caeuq dujrwz duzloeg, roxnaeuz aeu ceijgeng guh dujrwz. Gij gau dwg aeu faexnga lumj gau duzloeg guh baenz, daz saeknding roxnaeuz saekhenj, cap haeuj ndaw gyaеuj "duzloeg" bae. Aen ndang hix aeu faexduk san gonq, caiq aeu baengzhau raez miz saek haj cik nyib hwnjbae, aeu saekhenj daz henz, baihdaw aeu saeknding, saeklamz veh baenz yienghceij duzloeg, caiq veh seiq diuz ga duzloeg, youq baihlaeng duzloeg raiz "goenghoh bimoq" daengj cih. Bang lwgnyez foux duzloeg couh youq ndaw ndang "duzloeg" aeu song fwngz bae gaem faexnga baihdaw bae biujyienj.

Roek boux lwgsai gapbaenz aen doih ndeu, miz song duz "loeg", boux ndeu gag foux duz ndeu, boux ndeu ndaek laz, boux ndeu ndaek gyong, boux ndeu ndaek ca iq, lij miz boux ndeu hai roen. Bouxcuengh Sangswһ nyinhnaeuz lwgnyez gvaigvetgvet, gangj vah caen, hawj lwgnyez foux duzloeg youh ndei youh gitleih.

Doih foux duzloeg youq mbanj bonjfaenh foux gonq, sat le caiq bae mbanj wnq foux. Youq gyaеujmbanj foux, hoh aen mbanj neix baenz bi doenghgo demsou, rumz fwn habngamj. Doek-laeng caiq daengz gak ranz bae hohfuk.

Foux duzloeg aeu "goengheij" gonq, sien dingqnyі sing "dung dung dung dung dung dung ca". Mwhneix, danghnaeuz daiq miz bauqreng, couh coemh roix iq ndeu. Riengzlaeng, gij sing couh bienqbaenz "dung dung ca, dung dung ca, dung dung ca, dung dung ca, dung dung ca". Duzloeg lumj duzdouq diuq nei, "gyaеujloeg" bi bae bi dauq doxbungq doxangq. Foux duzloeg aiq foux cib faen cung, mbanj cix yawj bouxcawj seizlawz hawj hoengzbau, hawj vaiq couh foux vaiq, hawj menh couh foux numq di. Mbanj bouxcawj aeu dakbuenz cuengq hoengzbau, mbanj cix cigsoh cuengq gwnz namh, doengh laeq lwgnyez ndaek laz ndaek gyong de yawjraen le, couh roq ok gij diuh yaek sat haenx, laeq lwgnyez cang guh "duzloeg" couh daj ndaw bak iet fwngz okdaeuj gip hoengzbau, couh lumj "duzloeg" aeu linx riz aeu nei.

"鹿" caeuq "禄" doeg doxdoengz, duzloeg youq guek raeuz daj ciuhgeq daeuj couh dwg doenghduz leihndei, miz gij eiqsei miz fuk, gyaеusouh caeuq ra ndaej gwn. Ndwacieng danghnaeuz miz lwgnyez daengz ndaw ranz daeuj foux duzloeg, goengheij bimoq, couh dwg duzloeg daeuj hoh ranz bouxcawj miz "fuk, loeg, souh", daengx ranz vunz ndangcangq heiқ ndei, bimoq fatdad, bouxgeq ndaej gyaеu.

Foux duzloeg dwg cungj foux hohfuk youq ndwencieng daengj ciet Bouxcuengh Sangswһ bonjdieg cungj mbouj ndaej noix ndeu. Foux duzloeg mboujdan miz gij yinxdaeuz lwgnyez daegbied, lij ce miz gij ndwenngoenz, minzsug cienzdoengj, daegsaek minzcuz Bouxcuengh Sangswһ.



▲Bouxciepcienz guh gyaеujloeg.



▲Lwgnyez cang guh duzloeg.



▲Gyoengq lwgnyez lienh foux duzloeg.



▲Yienhciengz hozdung.